

Baluart di Angochi Juan Dominico Werleman

Parti 1

Naci humildemente riba e punto di sero pazuid na Angochi, patras den e mondinan di Santa Cruz. El a nace den e epoca di busca awa cu burico y su halifat. A crece na e cas cu e prome auto, e prome generator den bario y e prome telefon na pal'i telefon. Den un famia di cunukero a nace: Juan Chikito. Yiu di Juan Grandi, e famoso mansado di burico cu a mansa burico pa tur su bisinanan den e epoca prome cu auto.

Acompaña pa su estimada esposa Pilar, of Machi Nina. Na Caracas conoci como: "Juan de Nederland". Tambe cariñosamente conoci como "Mo Juan", "Pachi", "Pachi Juan" of "Skip", den bisindario. "Skip" ta un nomber específicamente uza entre su coleganan futbolista, cual tawata forma pa un gran parti door di su rumannan y su subrinonan.

Den futbol nan tawata tin codigonan como nomber, pa asina e contrincantenan no por a alineá ta unda e bala tawata bayendo, ni sa ken pa sigui. E trofeo di mas grandi cu bo por a gana den famia Werleman ta un nomber di cariño, ta cosnan cu placa no por cumpra. Den su mundo profesional, su amigo y mentor mas stima tawata Wim van Helvoort. Gobiernonan por a bay y bin. Politiconan tin manera di disparce si nan no haya e stoel tan desea. Pero nan dos, dia y anochi pa



decadanan, tur mashin tawata di nan y asina semper buscando un obstaculo nobo, pa embecece of complementa e infraestructura di e Isla cu tanto nan a stima.

Memey di tur e trabounan di mas bruto, asta e hardin di mas bunita di tur e hotelnan nan a gana cu Playa Linda e tempo ey, asina semper contemplando e horizonte. Di profesion un voorman di infraestructura pa entre otro ACI y Arubaanse Wegenbouw, el a cuminsa traha cu mashin banda di e cocalnan na Barcadera, djey nan a traha e tankinan na Zeewijk. Zeewijk tawata un dump prome cu esey.

Juan tawata tin un pasion y e ekipo pa core e tuberianan di WEB rond di e isla completo, y asina crea cuponan di trabou den un epoca di scarsedad, hopi mas prome cu e

status aparte. Ta hopi hende a haya trabou. Campeon ta reconoce campeón. Marduga e ta lanta, pasa busca su balente trahadonan. Tur sinta den baki di pick-up al estilo karioka, cu nan cuminda di merdia den man.

Tambe el a traha hopi caminda nobo di asfalt den e epoca di camindanan di tera y instalacionnan di desaroyo, verkaveling y di barionan nobo. Den e mundo di deporte e tawata e prome den Caribe cu independientemente a traha e canchanan di tennis di asfalt, un conocimiento cu a hera wordo importa di afo, cu ekiponan caro y innecesario. E prome di varios ta na Costa Linda, den e epoca unda cu nos historia di time-share a cuminsa. Prome cu esey, den e mundo di Drag Racing el a traha e Pista di Palo Marga. Pero tambe el a traha SV. Caravel y SV Sportboys. E cas di Dera Gai, e orguyo y evento preferi di su difunto tata stima. (Un tradicion cu nan a bin cune ariba, desde e tempo cu e tata tawata dirigi Club Trappers) Sportboys, tambe conoci como e cas di hisamento di fli, unda cu e isla completo tawata bin competi, principalmente Angochi y Bisindario. Caminda cu hasta participantenan di nos hermana isla Corsou tawata bin exhibi, y a introduci fli di caha y a pusta cu nos.

Parada di Carnaval di Kadushi Largo, futbol, domino, cah'i orgel y hopi mas. Eventonan nacional grandi y famoso. Organisa, engrandece, manteni y dirigi pa Rufo Kelly (y ekipo) cu ta un otro Icono y Baluarte cu'n curason grandi pa su comunidad y studiantenan di Colegio Laura Wernet Paskel. Yama pa Betico

Croes q.e.p.d. como "Juan Jr" un amigo personal di nos Libertador Betico Croes. El a cana desde dia uno, man den man cu Betico. Desde e momento cu Betico y Panchico Croes en felis memoria a cambia e bandera pa prome biaha. No ta un secreto, cu ta hopi momentonan y decisionnan cardinal pa historia di pais Aruba a tuma luga na Angochi. Pero esey ta un storia pa un otro dia.

Como un persona cu a biba politica y historia di su pais di cerca, su deseo semper tawata pa no tin mas pelea entre colornan, sino amor y cariño cu enfoca pa cu e desaroyo y expansion di nos pais cu adelanto di nos pueblo prome. Pa cuida e tiki mondi cu a resta, apoya nos cunukeronan y trece nos cunucu nan bek. Re-introduci esaki na e generacion cu ta bini: kico ta nos cumindanan, reme-

dinan di tera, e maneranan y sacrificio di nos grandinan di antes. Nunca e tabata un persona materialista, semper el a bisa, rico of pover, nos tur ta bay den e mesun caha. Rikese ta loke bo por comparti cu esnan cu bo ta stima of cu ta den un momento di necesidad. Na su hogar semper tabatin un manera pa rek e cuminda, pa cualkier bishita inespera. Mescos cu su tata, cualkier porta cu e lo por a habri pa un ser ker'i, cu mil amor el a habri'e.

Den e epoca di paga lomba cu lomba, e tawata yena cu felicidad, cada bes cu e wak e bandera di spantenbier bay halto y wak un famia nobo ta dreña nan hogar. Cada bes cu el a pone dak riba un cabes, ningun hende no tawata tin mester di sa, basta cu e muchanan por a bay scol, caba nan estudio y e cabesnan di famia haya un caminda pa por sosega despues di a pone pan riba mesa. Algun di nan ta lidernan den comunidad awendia.

Su wowonan tawata briya so, ora cu e weita un logro di un di nan ta aparece den noticia cu e ta scucha tur santo dia. "Mi yiu, un hende mester ta na altura ta kico ta pasando cu su pais." Cosecha a duna fruta. Al final di dia, su ekipo preferi semper tawata Aruba. Un homber di hopi fe, cu ta sinta resa tur anochi pa su famianan, unda sea cu nan por ta. Su yiunan y nietonan, su motibo principal pa hiba nan conoce mundo y keiro

